

दिनांक 27.05.2024

समय: 18.50 बजे

प्रादेशिक समाचार

- प्रदेश मांय जबरदस्त गर्मी अर लू रो दौर जारी— फलौदी मांय लगातार तीजा दिन पारो 49 डिग्री सेल्सियस ने पार कीनो।
- राज्य मांय आवता दो दिन ई लू अर तेज गर्मी री चेतावनी—चिकित्सा विभाग हाई अलर्ट मोड माथे।
- मुख्य निर्वाचन आयुक्त राजीव कुमार प्रदेश मांय लोकसभा चुनाव सारू पड़्या वोटों री गिणती री तैयारियां रो जायजो लीनो।

अर

- उपराष्ट्रपति जगदीप धनखड़ देश मांय फिटनेस संस्कृति विकसित करण माथे जोर दीनो।

000

राज्य मांय पड़ रह्या ज़ोरदार तावड़ा ऊं हाल बेहाल व्हे रह्या है। प्रदेश रा आतूणी हलकां मांय पारो 50 डिग्री सेल्सियस रे आरे—सारे चाल रह्यो है। फलौदी मांय लगातार तीजा दिन पारो 49 डिग्री सेल्सियस ने पार कर ग्यो। मौसम विभाग रे मुजब आवता दो दिन 24 ई घंटा ज़ोरदार गर्मी रो दौर चालेला। महकमो आज प्रदेश रा 16 जिलां मांय गर्मी रो रेड अलर्ट जारी कीनो है जद के काल 10 जिलां सारू गर्मी रा रेड अलर्ट रो ऐलाण करी ज्यो है अर 25 ऊं 35 किलोमीटर प्रति घंटा री रफ्तार ऊं ऊनो बायरो बाजण रा आसार है। राज्य मांय गर्मी रो दौर आवता 2—3 दिन ताई चालतो रेहवण री संभावना है। आवता 72 घंटां रे दौरान जोधपुर, बीकानेर, अजमेर अर जयपुर संभाग रा कुछ हलकां मांय 25 ऊं 35 किलोमीटर प्रति घंटा री रफ्तार ऊं बायरो बाजण रा आसार है। 29 मई ऊं राज्य रा ऊगणी हलकां अर 30 मई ऊं आतूणी हलकां मांय पारो 2—3 डिग्री सेल्सियस उतरण री संभावना है। ई बीचे टोंक मांय पंछियां सारू परिण्डा बांधी ज्या अर लोगां ने शिंकजी अर शरबत पिला र गर्मी ऊं साता देवण री कोशिश करी ज्यी। चूरू मांय ई पड़ रही गर्मी अर लू ऊं घणी परेशानी व्हे रही है। प्रशासन गर्मी अर लू ऊं बचाव सारू दोपहरां री बगत जरूरी व्हेवण परां ही बाहर जावण अर बाहर जावण री बगत शरीर ने ढक र निकळबा री

राय दीनी है। म्हाणा खबरनवीस बतायो के जबरदस्त गर्मी ऊं जिन्दगी माथे घणो असर पड़ रह्यो है।

-----

**जोधपुर** रा संभागीय आयुक्त पीवण रा पाणी, बिजली, मौसमी बीमारियां अर गर्मी ऊं उपजा हालात रो जायजो लेवण सारू अहलकारां सागे मीटिंग कीनी अर ज़रूरी हुकम दीना। **झालावाड़** मांय जिला कलेक्टर चिकित्सा विभाग कानी ऊं मौसमी बीमारियां री रोकथाम, ईलाज अर बचाव री जाणकारी देवण सारू तैयार करायी ज्या जागरुकता पोस्टर “हमारा झालावाड़—स्वस्थ झालावाड़” रो विमोचन कीनो।

ई मौके जिला कलेक्टर बतायो के जिला मांय डेंगू, स्क्रब टाईफस, मलेरिया अर चिकनगुनिया सरीखी बीमारियां री रोकथाम सारू 1 ऊं 30 जून ताई खास अभियान “हमारा झालावाड़—स्वस्थ झालावाड़” चलायो जावेला। ई रा तैत आशा अर एएनएम हलकावार घर—घर सर्वे करेला। बूंदी मांय लू, गर्मी अर मौसमी बीमारियां ऊं बचाव अर ईलाज बाबत चिकित्सा सेवा ने मजबूत बणावण रा काम रो सीएमएचओ निरीक्षण कीनो। केकड़ी री जिला कलेक्टर ई जिला अस्पताल रो दौरा कर र मरीजां सागे बातचीत कीनी अर अहलकारां ने ज़रूरी हुकम दीना। **नागौर** मांय जिला कलेक्टर रेलवे टेशन अर रोड़वेज बस स्टैंड माथे बिजली अर छाया—पाणी री व्यवस्थावां रो जायजो लीनो अर अहलकारां ने ज़रूरी हुकम दीना। **डूंगरपुर** रा जिला कलेक्टर जिला अस्पताल रो दौरा कर र अहलकारां ने ज़रूरी हुकम दीना। **श्रीगंगानगर** मांय ई जिला कलेक्टर सरकारी अस्पताल रो दौरा कर र व्यवस्थावां रो जायजो लीनो। जैसलमेर मांय सीमा सुरक्षा बल—बी.एस.एफ. री 191वीं वाहिनी री ओर ऊं जनता सारू ठंडा शर्बत अर पाणी री व्यवस्था करी ज्यी है। **उदयपुर** मांय ट्रेफिक लाईटां कने छाया सारू तम्बू ताणी ज्या है। **कोटा** मांय जनता ने साता देवण सारू प्रशासन री ओर ऊं रेलवे टेशन, बस स्टैंड, जे.के. लोन अस्पताल अर महाराव भीमसिंह अस्पताल समेत न्यारी—न्यारी ठौड़ां ठण्डा पाणी अर छाया री व्यवस्था करी ज्यी है। **बाड़मेर** मांय नगर परिषद री ओर ऊं सड़कां माथे पाणी रो छिड़काव करायो जा रह्यो है अर जिला रा गांवांई हलकां मांय टैंकरां रे जरिये पाणी पूगायो जा रह्यो है। **जयपुर** रा हवामहल परिसर मांय ई गर्मी ऊं बचाव सारू पाणी रो छिड़काव करायी ज्यो अर फव्वारा चलायी ज्या। जंतर—मंतर परिसर मांय ई पाणी रो छिड़काव करायी ज्यो। **झालावाड़** अर **बूंदी** मांय ई सड़कां माथे पाणी रो छिड़काव करायी ज्यो। **ब्यावर** मांय परिन्दां ने गर्मी ऊं बचावण सारू आज जिला कलेक्टर कलेक्ट्रेट अर उपखंड कार्यालय परिसर मांय परिण्डा बांध र खास अभियान री सरूआत कीनी।

वे जनता ऊं ई परिण्डा बांध र वां मांय दाणा—पाणी अर साफ—सफाई री व्यवस्था करण री अपील कीनी। **सिरोही** जिला मांय पड़ रह्या तेज तावड़ा बीचे माउंट आबू मांय कम गर्मी रे कारण वठे देश भर ऊं सैलाणी पूग रह्या है। **शाहपुरा** जिला मांय फूलिया थाना हलका रा नई अरवड़ गांव मांय पीवण रा पाणी री मांग करता थकां

लोग नेशनल हाई—वे नंबर 148 डी माथे जाम लगा दीनो, जिण ने अहलकार समझाइश कर र खुलवायो।

000

चिकित्सा अर स्वास्थ्य मंत्री गजेन्द्र सिंह खीवसर आज गर्मी अर लू रा बारा मांय आज जयपुर मांय व्यवस्थावां रो जायजो लीनो। मीटिंग पाछे मंत्री कह्यो के चिकित्सा विभाग हाई अलर्ट मोड माथे है। वे बतायो के सगळा चिकित्सा कर्मचारियां री छुट्टिया रद्द कर दीरीजी है अर अहलकारां ने फील्ड मांय रेहवण रा हुकम दिया ज्या है। मंत्री कह्यो के अस्पतालां मांय व्यवस्थावां री कोई कमी नी है।

.....

ई बीचे चिकित्सा विभाग री अतिरिक्त मुख्य सचिव शुभ्रा सिंह जयपुर रा जयपुरिया अस्पताल मांय लू अर गर्मी रा मरीजां रा ईलाज सारू करी ज्यी व्यवस्थावां रो जायजो लीनो। वे जनता ऊं गर्मी रा मौसम मांय लू ऊं बचाव सारू सगळा एहतियाती उपाय करण री अपील कीनी।

.....

000

मुख्य निर्वाचन आयुक्त राजीव कुमार आज वीडियो कॉन्फ्रेंस रे मार्फत प्रदेश मांय लोकसभा चुणाव सारू पड्या वोटों री चार जून ने करी जावण वाळी गिणती री तैयारियां रो जायजो लीनो। वे राज्य रा सगळा 25 लोकसभा हलकां रा चुणाव अर बांसवाड़ा जिला री बागीदौरा विधानसभा सीट सारू व्ह्या उपचुणाव सारू वोटों री गिणती री व्यवस्थावां माथे संतोष जतायो। मीटिंग मांय निर्वाचन आयुक्त ज्ञानेश कुमार अर डॉ. सुखबीर सिंह संधू ई मौजूद हा।

राज्य रा मुख्य निर्वाचन अधिकारी प्रवीण गुप्ता बतायो के राज्य मांय वोटों री गिणती री सगळी तैयारियां पूरी व्हे ग्यी है अर पर्याप्त संख्या मांय वोटों री गिणती री ड्यूटी मांय लाग्योडां कर्मचारियां ने सिखावण दीरीजी है। गुप्ता बतायो के वोटों री गिणती रा काम अर मतगणना केंद्र री व्यवस्थावां रा बारा मांय थावर ने सियासी पार्टियां रा नुमाइन्दां सागे ई मीटिंग करी ज्यी। मीटिंग मांय सियासी पार्टियां ऊं काउंटिंग एजेंट्स री लिस्ट 31 मई ताई संबंधित चुणाव अहलकार रा दफ्तर मांय देवण सारू कही ज्यो। गुप्ता बतायो के वोटों री गिणती री ठौडां हिफाजत रा पुख्ता इंतजामात करी ज्या है। वे बतायो के वोटों री गिणती सारू 3 हजार 550 माइक्रो ऑब्जर्वर अर 1 हजार 200 एआरओ तैनात करी ज्या है। वोटों री गिणती रा दिन पूरा राज्य मांय सूखा दिवस रो ऐलाण करी ज्यो है। मुख्य निर्वाचन अधिकारी बतायो के राज्य रा 25 लोकसभा हलकां सारू पड्या वोटों री 29 केन्द्रा माथे गिणती करी जावेला। जोधपुर, नागौर, करौली— धौलपुर अर गंगानगर लोकसभा हलकां मांय गिणती सारू दो—दो मतगणना केंद्र बणाया जावेला।

000

जलदाय मंत्री कन्हैया चौधरी कह्यो है के राज्य मांय पीवण रा पाणी री पूर्ति सारू अढ़ाई हजार नुवा हैंडपम्प खोद्या जावेला अर खराब हैंडपम्पां री मरम्मत करायी जा रही है। आज जयपुर मांय खबरनवीसां सागे बातचीत करता थकां वे आ जाणकारी दीनी। जलदाय मंत्री कह्यो के प्रदेश मांय जमीं हेटे पाणी रो लेवल करीब 100 फीट नीचे उतर ग्यो है। वे जनता ऊं पाणी बचावण री अपील कीनी।

000

उपराष्ट्रपति जगदीप धनखड़ कह्यो है के देश मांय फिटनेस संस्कृति विकसित करण री जरूरत है। वे आज बैंगलूरु मांय आईसीएमआर रा एक कार्यक्रम मांय बोल रह्या हा। उप राष्ट्रपति कह्यो के देश रा परम्परागत इलाज रा तरीकां माथे ध्यान देवण री जरूरत है। धनखड़ कह्यो के देशभर मांय पंचायत लेवल माथे दवाइयां रा गुण वाळा पौधा लगाया जावणा चाहिजे।

000

भारतीय वन सेवा रा आला अहलकार अभिजीत बनर्जी राज्य रा प्रधान मुख्य वन संरक्षक बनायी ज्या है। बनर्जी प्रधान मुख्य वन संरक्षक मुनीश गर्ग री ठौड़ लेवेला जो 31 मई ने रिटायर व्हे गया है।

000

देश रा पहला प्रधानमंत्री पंडित जवाहरलाल नेहरू ने आज वां री बरसी रे मौके सिरधाभाव सागे याद करी ज्या। ई मौके राज्य मांय ई केई कार्यक्रम राख्यी ज्या। जयपुर मांय कांग्रेस रा प्रदेश मुख्यालय मांय श्रद्धांजलि कार्यक्रम राख्यी ज्यो। टोंक मांय विचार गोष्ठी राख्यी ज्यी। अजमेर मांय नेहरू जी री मूरत माथे फूल माळा चढा र वां ने याद करी ज्या। ई मौके बांसवाड़ा मांय ई आज कार्यक्रम राख्यी ज्यो।

000

प्रदेश रा ट्रांसजेंडर समुदाय ने राज्य रा अन्य पिछड़ा वर्ग मांय शामिल करी ज्या है। आज जयपुर रा उपखण्ड अधिकारी, प्रथम राजेश जाखड़ जिला कलक्ट्रेट परिसर मांय नूर शेखावत नाम रा ट्रांसजेंडर ने अन्य पिछड़ा वर्ग रो सर्टिफिकेट दीनो। जाखड़ बतायो के अब ट्रांसजेंडर समुदाय रा लोग नियमानुसार पिछड़ा वर्ग प्रमाण पत्र हासिल कर सके है।

000